

七十二家集

蔡中郎集卷之十一

漢陳留蔡邕伯喈著

明閩漳張爕紹和纂

碑

光武濟陽宮碑

惟漢再受命曰世祖光武皇帝考南頓君初爲
濟陽令濟陽有武帝行過宮常封閉帝將生考
以令舍下濕開宮後殿居之建平元年十二月
甲子夜帝生時有赤光室中皆明使卜者王長

卜之長曰此善事不可言歲有嘉禾一莖生九穗長於凡禾因爲尊諱王室中微哀平短祚姦臣王莽偷有神器十有八年罪盈惡熟天人致誅帝乃龍見白水淵躍昆蚩破前隊之衆殄三公之師收兵畧地經營河朔戮力戎功翼戴更始義不卽命帝位闕焉於是羣公諸將據河洛之文叶符瑞之珍僉曰歷數在帝踐祚允宜乃以建武元年六月乙未卽位鄯縣之陽五成之陌祀漢配天不失舊物享國三十六年方內乂

安蠻夷率服巡狩泰山禪梁父皇代之遐迹帝
者之上儀罔不畢舉道德餘慶延于無窮先民
有言樂樂其所自生而禮不忘其本是以虞稱
嬀汭姬美周原皇天乃眷神宮實始于此厥跡
邈哉所謂神麗顯融越不可尚小臣河南尹輦
瑋先祖銀艾封侯歷世卿尹受漢厚恩瑋以商
箕餘烈郡舉孝廉爲大官丞來在濟陽顧見神
宮追惟桑梓褒述之義用敢作頌頌曰
赫矣炎光爰耀其輝篤生聖皇貳漢之微稽度

虔則誕育靈姿黃華作慝纂握天機帝赫斯怒
爰整其師應期潛見扶陽而飛禍亂克定羣凶
殄夷匡復帝載萬國以綏廵于四嶽展義省方
登封降禪升于中皇爰茲初基天命孔彰子子
孫孫保之無疆

王子喬碑

王孫子喬者蓋上世之真人也聞其僊舊矣不知興於何代博問道家或言潁川或言彥蒙初建斯域則具斯丘傳承先人曰王氏墓紹胤不繼荒而不祠歷載彌年莫之能紀暨于永和元年十有二月當臘之夜上有哭聲其音甚哀附居者往聞而恠之明則登其墓察焉洪雪下無人踪見一大鳥跡有祭祀之處左右或以爲神其後有人着絳冠大衣杖竹策立冢前呼樵孺

子尹禿謂曰我王子喬也爾勿復取吾先人墓
前樹也須臾忽然不見時令太山萬熙稽古老
之言感精瑞之應咨訪其驗信而有徵乃造靈
廟以休厥神於是好道之儔自遠來集或絃歌
以詠太一或談思以歷丹田其疾病疴瘵者靜
躬祈福卽獲祚若不虔恪輒顛踣故知至德之
宅兆真人之先祖也延熹八年秋八月皇帝遣
使者奉犧牲以致祀祇懼之敬肅如也相國東
萊王章字伯義以爲神聖所興必有銘表昭示

後世是以賴鄉仰伯陽之踪關民慕尹喜之風
乃會長史邊乾訪及士隸遂樹玄石紀遺烈俾
志道者有所覽焉詞曰

伊王君德通靈含光耀秉純貞應大道羨久榮
棄世俗飛神形翔雲霄浮太清乘螭龍載鶴輶
戴華笠奮金齡揮羽旗曳霓旌懽罔極壽億齡
昭篤孝念所生歲終闋發丹情存墓冢舒哀聲
遺鳥跡覺舊城被絳衣垂紫纓呼孺子告姓名
由此悟感怖驚脩祠宇及几筵饋饌進甘香陳

時傾顧馨明
禋匡流祉熙
帝庭祐邦國
和黔民
光景福耀無垠

伯夷叔齊碑

熹平五年天下大旱禱請名山求獲答應時處
士平陽蘇騰字玄成夢陟首陽有神馬之使在
道明覺而思之以其夢陟狀上聞天子開三府
請雨使者與郡縣戶曹掾吏登山升祠手書要
曰君况我聖主以洪澤之福天尋興雲卽降甘
雨因樹碑爲銘曰

惟君之質體清良今昔佐殷姬忠孝彰今委國
捐爵諫國亡今譏武伐紂欲喻臣今時不可救

歷運蒼兮追念先侯受命皇兮憂懷感兮雖沒
不朽名字芳兮

九疑山碑

巖巖九疑峻極于天觸石膚合興播連雲時風
嘉雨浸潤下民芒芒南土實賴厥勛逮于虞舜
聖德光明克諧頑傲以孝蒸蒸師錫帝世堯乃
授徵受終文祖璇璣是承泰階以平人以有終
遂葬九疑解體而升登此崔嵬託靈神仙

陳留索昏庫上里社碑

社祀之建尚矣昔在聖帝有五行之官而共工
子勾龍爲后土及其沒也遂爲社祀故曰社者
土地之主也周禮建爲社位左宗廟右社稷戎
醜攸行於是受服土膏恒動於是祈農又頒之
于兆民春秋之中命之供祠故自有國至于黎
庶莫不祀焉惟斯庫里古陽武之戶牖鄉也春
秋時有子華爲秦相漢興陳平由此社宰遂佐
高帝克定天下爲右丞相封曲逆侯永平之世

虞延爲太尉司空封公至嘉平延弟曾孫放字
子卿爲尚書令外戚梁冀乘寵作亂首策誅之
王室以續封召都亭侯太僕太常司空毗天子
而維四方克措其功徃烈有常於是司監爰暨
邦人僉以爲宰相繼踵咸出斯里秦一漢三而
虞氏世焉雖有積善餘慶脩身之致亦斯社之
所相也乃相與樹碑作頌以示後昆云

唯王建祀明事百神乃顧斯社于我兆民明德
惟馨其慶聿彰自羸及漢四輔代昌爰我虞宗

乃世重光元勲旣立錫茲土疆乃公乃侯帝載
用康神人協祚且巨且長凡我里人盡受嘉祥
刊銘金石永世不忘

瑯琊王傳蔡公碑

君諱朗字仲明蓋倉頡之精胤姬稷之末胄也
昔叔度文王之昭建侯于蔡以國氏焉迄于平
襄周祚微缺王室遂卑齊晉交爭強楚侵陵昭
侯徙于州來公族分遷氏家于圉奕葉載德常
歷官尹以逮于茲君雅操明允威厲不猛履孝
悌之性懷文藝之才包洞典籍刊摘沉秘知幾
達要通含神契旣討三五之術又采二南之業
以魯詩教授生徒雲集莫不自遠並至栖遲不

易其志簞食曲肱不改其樂心棲清虛之域行
在玉石之間是以德行儒林智周當代四岳稱
名帝曰予聞元和元年徵拜博士舒演奧秘贊
理闕文所立卓爾度躡雲蹤其選士也抑頑錯
枉進聖擢偉極遺逸於九臯揚明德於側陋拔
茅以彙幽滯用濟加以清敏廣平好是正直規
誨之策日諫王庭忠讜著烈令聞流行聖朝以
藩國貴胄先帝遺體或以繼絕襲位正於阿保
未洽雅訓驕盈僭差或蹈憲理非弘直碩儒莫

能匡弼蔡君審行脩德進退可度遷河間中尉
琅瑯王傳乃從經術之方示以斐謚之威率禮
莫違其國用靖雖安國之輔梁孝仲舒之相江
都靡以加焉勲績旣盛帝簡其功將授上位遷
于紫宮賦壽不永遭此疾凶年五十八未興六
年夏卒嗚呼哀哉凡百君子咨痛罔極殷懷傷
悼含涕流惻如何昊天喪我師則爰勒斯銘式
昭其德天敏明哲於赫我君含弘光大玄覽孔
真潛樂教思韞玉衡門雲龍感應養徒三千珠

藏外耀鶴鳴聞天若時徵庸登祚王臣綜彼前
疑定此典文叅佐七德俾相大藩身沒稱顯永
遺令勲表行揚名垂示後昆

玄文先生李子材碑

玄文先生名休字子材南陽宛人也其祖李伯陽周柱下史覲衰世而遁焉其後雄俊豪傑徃徃崛起自戰國及漢名臣繼踵支胄散逸其遷于宛尚矣王莽竊位漢祚中移考翼佐世祖匡復郊廟錫封茅土卿相牧守于時相逐休少以好學游心典謨旣綜七經又精群經鉤深極奧窮覽妙旨居則玩其辭動則察其變雲物不顯必考其占故能獨見前識以先神意若古今常

難疑義錯繆前人所希論後學所不覽休盡剖
判剥散幽暗靡不昭爛猶發憤於目所不覩體
所不閑遂登東岳觀百王遺風習容闕里以協
禮衷退而講誨童冠仰焉傳傳如也郡署五官
掾功曹司空胡公顯以儒譽特進大鴻臚仍優
禮固請秉讓執虛辭此三命不爲利回不爲義
疚臨寵審已不動其守可謂純潔皓素綽有餘
裕者已其於鄉黨細行敦睦九族篤信交友不
可得而詳也初娶配出後配未字年旣五十苗

胤不嗣以永壽二年夏五月乙未卒凡其親朋
朋徒相與大會而葬之鼎俎之禮節文曲備時
令戴君臨喪命謚郡遣丞掾冠蓋咸屆既定而
後罷焉於是故好朋舊僉以仲尼既沒文不在
茲韞櫝美玉喪莫賈之求而無繼懷爾永思乃
刊斯石懿德是不吁茲先生秉德恭勤天啟哲
心其學孔純經緯是綜雅麗是分行已守道匪
禮不遵處約不戚聞寵不欣榮不能華威不能
震天淑厥命以讓以仁有惠云載惟邦之珍按

典考謚謚以玄文身沒名彰配黔作隣遺譽罔
極丕昭億年嗚呼哀哉

郡掾史張玄祠堂碑

掾諱玄字伯雅河南偃師人也其先張仲者實以孝友爲名左右周室大漢初興張蒼爲丞相封北平侯其後自河內遷于茲土世爲顯姓掾天姿恭恪宣慈惠和允恭博敏惻隱仁恕正身履道以協閨庭損用節財以贍䟽族動中規矩言合典式不知名彰不飾行著可謂仁粹淑貞自然之素者已論者嘉之州郡禮招署致掾史沉静寡欲不求榮祿是以豐於天爵薄於人位

某月日遭疾而卒掾孫翻以貞固之質受過庭之訓獲執戟出宰相邑遷太守得大夫之祿奉烝嘗之祀尋原祚之所由而至於此先考積善之餘慶陰德之陽報乃於是立祠堂假碑勒銘式明令德以示乎後辭曰

於惟我考允迪懿德治信斯順其儀不忒仁惠周洽行惟模則篤垂餘慶貽此燕翼邈矣遺孫用懷多福刊名金石流于罔極

袁滿來墓碑

茂德休行曰袁滿來太尉公之孫司徒公之子
逸才淑姿實天所授聰遠通敏越齷在闕明習
易學從誨如流百家衆氏遇目能識事不再舉
問一及三具始知終情性周備夙有奇節孝智
所生順而不驕篤友兄弟和而無忿氣決泉達
無所凝滯雖冠帶之中士校材考行無以加焉
允公族之殊異國家之輔佐衆律其器士嘉其
良雖則童稚令聞芬芳降生不永年十有五四

月壬寅遭疾而卒旣苗而不穗凋殞華英嗚呼
悲夫乃假碑旌于墓表嗟其傷矣唯以告哀

童幼胡根碑

故陳留太守胡君子曰根字仲原生有家表幼而克才角犀豐盈光潤玉顏聰明敏惠好問早識言語所及智思所生雖成人之德無以加焉稟命不長夙罹凶災年七歲建寧二年遭疾夭逝慈母悼痛昆娣孔懷感襁褓之親愛憐國城之乖離乃權宜就封二祖墓側親屬李陶等相與追慕先君悲悼遺嗣樹碑刊辭以慰哀思辭曰

於惟仲原應氣淑靈實有令儀而氣如瑩明之
之性與體俱生聞言斯誠覩物知名傳者太勤
受誨則成柔和順美與人靡爭忿不怨懟喜不
驕盈當受福永爲光爲榮如何昊天降此短齡
惜繁華之方晬兮望嚴霜而凋零嗟童孺之夭
逝兮傷慈母之肝情從皇祖乎靈兆兮庶神魄
之斯寧哀慘戚以流涕兮念污軫之不停顧永
懷於不朽兮乃託辭於斯銘

蔡中郎集卷之十二

漢陳留蔡邕伯喈著

明閩漳張爕紹和纂

靈表

太傅胡公夫人靈表

夫人編縣舊族章氏之長女也字曰顯章令儀
小人秉操塞淵仁孝婉順率禮無遺體季蘭之
姿蹈思齊之跡永初二年年十有五爰初來嫁
誕成家道仰奉慈姑竭歡致敬俯誨膝下化導

周悉至德脩於幾微徽音暢於神明故能叅姪
姒之功兼生人之榮朝春路寢贊桑蚕宮光寵
有祭祭服有琬前後奉斯禮者三十餘載夫人
生五男長曰整伯齊次曰千億叔韡次曰寧穉
威次曰碩季獻伯仲各未加冠遭厲氣同時夭
折叔上郡孝廉季更歷州郡舉茂才葉令京令
爲議郎季以高第爲侍御史諫議大夫侍中虎
賁中郎將陳留太守皆早郎世夫人哀悼劬悴
由是被疾遭太夫人憂篤建寧三年薨夫人之

存也契闊中饋婉戀供養依生奉仁紹述雅意
其閨月附于太夫人窀穸于茲地魂而有靈欽
明定省神心欣焉其實寧之元女金盈追慕永
思憐怛罔極遂及斯表鑄著堅珉頌曰悲母氏
之不永懷殷恤以摧傷惟子道之無窮惜聞誨
之未央庶黃耆以期頤胡委我以夙喪恒思心
以激切亦割肝以絕腸昔先聖之遺辭言仁者
其壽長嗟母氏之憂患體愷悌以慈良失延年
之報祐獨何棄於穹蒼日月忽以將暮抱長結

以含愁尋脩念於在昔原疾病之所由遭元子
之弱天心傷悴以自憂暨叔季之殞終哀情結
以彌綢皇姑沒而中感遂大漸兮速流疾黯黯
而日邁氣微微以長浮銷精魂以遐翔曾不可
乎援留爾乃順旨於冥冥繼存意於不違爰拊
靈於皇姑尚魂魄之有依潛幽室之黯漠惜昭
明之景輝一往超以未及傾祖邈其彌遲顧新
廟以累欷伏几筵而增悲嗟旣逝之益遠耿悠
悠而莫追

司徒袁公夫人馬氏靈表

維光和七年司徒袁公夫人馬氏薨其十一月
葬哀子懿達仁達銜恤哀痛靡所寫懷乃撰錄
母氏之德履示公之門人覩文感義采石于南
山諮之群儒假貞石以書焉夫人右扶風平陵
人也曾祖中水侯祖將作大匠考南郡太守中
水侯弟伏波將軍女在淑媛作合孝明誕生孝
章婚姻帝室世爲名族夫人生應靈和德精性
妙角犀豐盈實有偉表溫慈惠愛慎而寡言幼

從師氏四禮之教早達窈窕德象之儀及笄求
匹明哲供治婦業孝敬婉孌畢力中饋後生仰
則以爲謨憲自公歷擢王官至宰相夫人營克
家道扶翼政事聰明達乎中外隱括及乎無方
不出其機化導宣暢童子無驕逸之尤婦妾無
捨力之愆故能窮生人之光寵獲福祿之豐報
朝春政於王室躬桑繭於蠶宮春秋六十有三
寢疾不永懿等追想定省尋思髣髴哀窮念極
不知所裁乃申辭曰

於穆母氏其德孔休思齊先始百行聿脩宣慈
惠和恩澤並周義方之訓如川之流俾我小子
蒙昧以漉不享遐年以求春秋徃而不返潛淪
大幽嗚呼哀哉几筵虛設幃帳空陳品物猶在
不見其人魂氣飄飄焉所安神兄弟何依姊妹
何親號咷忉怛曾不我聞吁嗟上天何辜而然
傷逝不續徃者不旋

誄

濟北相崔君夫人誄

維延熹四年故濟北相崔夫人卒嗚呼哀哉世
喪母儀宗殞憲師哀哀孝子靡所瞻依凡百赴
弔至止增悲投涕歔歔共叙赫姿乃爲誄曰
清和有鑠時惟哲母令儀令色爰以資始塞淵
其心淑慎其止于母斯勤在于斯敏仰覽篇籍
俯釐絲枲多才多藝于何不有休譽邈焉允女
之英乃及崔君惟德是行其德伊何實粹實明

虔恭事幾契闕中饋敦此婉順疾彼攸遂思齊
徽音晨興夜寢穆穆其猷莫之與二天祚明德
底之方穀於赫崔君膺茲祉祿夫人有胤翼此
清淑仁風溫潤義惠優渥推恩中外施浹䟽族
食不兼膳服不織縠以儉爲榮以奢爲辱堂堂
其胤惟世之良于其令母受茲義方訓以柔和
董以嚴剛怒不傷愛喜不亂莊納之軌度終然
允臧是用登濟享其寵光雖則崇盛猶匪寧息
同其婦子茂師其職服貴無荒尊不舍力密勿

不忘惟德之極昔在共姜陪臣之母勞謙紡績
仲尼是紀矧茲夫人帝室命婦猶日孜孜復禮
克己人亦有言仁者壽長宜登永年黃耆無疆
昊天不弔降此殘殃寢疾彌留精爽倅傷慘怛
孝子惻惻其惶靡神不舉無藥不將嗚呼哀哉
於是孝子長吁氣絕復蘇號呼告哀不知其辜
昊天上帝忍弔遺孤尋想遊靈焉識所徂嗚呼
哀哉旣殯神柩薄言于歸冢宰喪儀循禮無遺
切切喪主瘠羸哀哀情兮長慕涕兮無睎行旅

揮涕千里于咨乃謀卜筮言考其良建彼北域
于時翳藏冥冥窀穸無時有陽燈燭既滅馬道
納光形影不見定省何望嗟其哀矣不可弭忘
日月代序古有如喪由斯夫人榮烈有章配彼
哲彥既隆且昌顧景赫奕饋供孔將惟以慰懷
庶無永傷嗚呼哀哉

神誥

漢交趾都尉胡夫人黃氏神誥

夫人江陵黃氏之季女字曰列羸其先出自伯
翳別封于黃以國氏焉高祖父汝南太守曾祖
父延城大尹祖父番禺令父以主簿嘗證太守
事奉明君以立臣節漢南之士以爲美談初都
尉君娶于故豫州刺史郎黃君之姊生太傅安
樂侯廣及卷令康而卒繼室以夫人生童紀未
訖而夭夫人懷聖善之姿韜慈母之仁撫育二

孤導以義方思齊先姑神罔時恫故能迄用有
成誕膺繁祉廣歷五卿七公拜封之祿康亦由
孝廉宰牧二城九畝之義夫人是享爰暨稚孫
更仕三宮或典百里或作虎臣銀艾貂蟬近侍
顯尊受茲介福于我夫人自郡尉仕于京師及
廣兄弟式叙漢朝夫人居京師六十有餘載其
乘輅執贊朝皇后採桑桑于蠶宮手三盆于繭
館者蓋三十年上有帝室寵光之休下有堂宇
斤斤之祚心耽其榮體安其遠圖長慮迥用遺

舊居欲留此焉康寧之時亟以爲言太夫人年
九十一建寧二年薨于太傅府是月辛酉公之
季子陳留太守碩卒于洛陽左池里舍公銜哀
悼祇慎其屬遵奉遺意不敢失墜乃俾元孫顯
咨度羣儒以考其衷僉曰昔帝舜沒於蒼梧殯
於虞郊二妃薨於江湘不卽兆于九疑延陵季
子寔惟吳人長子道終卜葬靡博夫遭時而制
不遠遷徙魂氣所之不繫丘壠帝舜以之神罔
時怨季札以之仲尼嘉焉鑒帝籍之高論綜精

靈之幽情稽先人之遐迹順母氏之所寧茲事
體通而義同允不可替於是公乃爲辭昭告先
考然後卜定宅兆龜筮悉從遂營窀穸之事舉
封樹之禮十月旣望粵翌日巳酉葬我夫人黃
氏及陳留太守碩于此高原維陽東界關亭之
阿天子使中常侍謁者李納弔且送葬持賻錢
二十萬布二百疋并以中牢祠群后畢會榮哀
孔備于時濟陽故吏舊民中常侍勾陽于肅等
二十三人思應慕化推本議銘著斯碑石俾諸

昆裔瞻仰以知禮之用是爲神誥乃申頌曰
於穆夫人家邦之媛昔在嬴代黃國氏建至于
近祖亦降于漢天祚明德福祿流衍旣作母儀
履信思順登壽耄耄耄用永蕃變子孫以仁追稽
先典厝茲洛濱齊跡湘靈配名古人休矣耀光
千億斯年

哀讚

議郎胡公夫人哀讚

議郎夫人趙氏字曰永姜允有令德秉心塞淵
舒詳開雅儀節孔備女師四典窈窕德象罔不
習熟以供婦道議郎早世檢誨幼孤義方以導
其性中禁以閑其情孤顯儉節用免咎誨少辟
侍中襲先公之爵以議郎出爲濟陰太守是時
夫人寢疾未薨而國家方有滎陽寇賊震驚帝
師簡選州辟授任進衛不得辭王命親醫藥夫

人乃自矜精稟氣力俛起若愈以勸遣顥到官
月餘所疾暴盛春秋五十八中平四年薨于京
師顥有剖符之寄偪於國典疾篤不得顧親增
感氣絕不能自有慎終之事闕焉永廢雖不毀
以隨沒亦困悴而傷懷知我如此不如勿生號
咷告哀以乞骸骨踰年然後獲聽追惟考君存
時之命迎棺舊土同穴此城孤心摧割靡所底
念仰瞻二親或有神誥靈表之文敢曰亮闇叙
我憂痛作哀讚書之于碑

愍予小子夙罹孔艱嚴考殞沒我在齠年母氏鞠育載矜載憐殷斯勤斯慈愛備存匪惟驕之範我軌度教誨嚴肅昭示好惡俾我克類畏威忌怒用免咎悔踐繼先祖卽爵其土二將是臨與帝剖符守于濟陰夫人寢疾榮此寵休疾用歡痊翊日斯瘳將征將邁從養陶丘景命徂逝不愍少留疾大漸以危亟今精微微而浸衰逼王職於憲典今子孫忽以替違目不臨此氣絕兮手不親夫含飯陳衣衾而不省兮合綆棺而

不見昔予考之卽世今安宅兆于舊邦依存意
以奉亡今遷靈柩而同來考妣痛以慘今離乖
神柩集而移今增哀黃墟密而無間今出入閔
其無門舁柩在茲今不知魂景之所存悼孤衷
之不遂今思情慘以傷肝幽情淪於后坤今精
哀達乎昊乾

祝辭

宗廟祝嘏辭

嗣曾孫皇帝某敢昭告于皇祖高皇帝各以后
配昔受命京師都于長安享國十有一世歷年
二百一十載遭王莽之亂宗廟隳壞世祖復帝
祚遷都洛陽以服土中享國一十一世歷年一
百六十五載予末小子遭家不造早統洪業奉
嗣無疆關東吏民敢行稱亂總連州縣擁兵聚
衆以圖叛逆震驚王師命將征服股肱大臣推

皇天之命以已行之事遷都舊京昔周德缺而
斯干作應運變通自六川之於是乃以三月丁
亥來自維越三月丁巳至於長安飭躬不慎寢
疾旬日賴祖宗之靈以獲有瘳吉旦齊宿敢用
潔牲一元大武柔毛剛鬣商祭明視薌合嘉蔬
香其醑醢豐本明粢醴酒用告遷來尚饗

九祝辭

高皇帝使工祝承致多福無疆于爾嗣曾孫皇
帝使爾受祿于天宜此舊都萬國和同兆民康
乂眉壽萬年子子孫孫永守民庶勿替引之

祝社文

元正令午時惟嘉良乾坤交泰太簇運陽乃祀
社靈以祈福祥

祖餞祝文

今歲淑月 日吉時良爽應孔加君當遷行神
龜吉兆林氣煌煌著卦利貞天見三光鸞鳴雍
雍四牡彭彭君旣升輿道路闡張風伯雨師洒
道中央陽遂求福蚩尤辟兵倉龍夾轂白虎扶
行朱雀道引玄武作侶勾陳居中厭伏四方徃
臨邦 長樂無疆

楔文

洋洋暮春厥日除巳尊卑煙鶩惟女與士自求
百福在洛之汜

吊文

吊屈原文

鷓鴣軒翥鸞鳳挫翮啄碎琬琰寶其瓠瓠皇車
奔而失轄執轡忽而不顧卒壞覆而不振顧抱
石其何補

文

篆勢

字畫之始因於鳥跡蒼頡循聖作則制文體有
六篆巧妙入神或象龜文或比龍鱗紆體放尾
長超短身頽若黍稷之垂穎蘊若蟲蛇之棼縕
揚波振擊鷹峙鳥震延頸脅翼勢欲凌雲或輕
舉內投微本濃末若絕若連似露絲綵凝垂下
端從者如懸衡者如編抄者邪趣不方不圓若
行若飛岐岐翾音喧小飛貌翾遠而望之若鴻鵠群

遊絡繹遷延迫而視之湍際不可得見指揮不
可勝原研桑不能數其詰屈離婁不能覩其隙
間般倅揖讓而辭巧籀誦拱手而韜翰處篇籍
之首目粲粲彬彬其可觀摘華豔於統素爲學
藝之範開嘉文德之弘懿蘊作者之莫刊思字
體之俯仰舉大畧而論旃古文苑起句云鳥遺
跡皇頤循聖作則制
斯文體有六篆爲真形要妙巧人
神或龜文斜列櫛比龍鱗餘同

隸勢

鳥跡之變乃惟佐隸攔彼繁文崇此簡易厥用
旣行體象有度與若星陣鬱若雲布其大徑尋
細不容髮隨事從宜靡有常制或穹窿恢廓或
櫛比鍼列或砥繩平直或蜿蜒繆戾或長邪角
趣或規旋矩折脩短相副異體同勢奮華輕舉
離而不絕纖波濃點錯落其間若鐘簴設張庭
燎飛煙嶄嵒崔嵯高下屬連似崇臺重宇層雲
冠山遠而望之若飛龍在天近而察之心亂目

眩竒姿譎誕不可勝原研桑所不能計宰賜所
不能言何草篆之足算而斯文之未宣豈體大
之難觀將秘奧之不傳聊佇思而詳觀舉大畧
而論旃

九惟文

八惟困乏憂心殷殷天之生我星宿值貧六極
之厄獨遭斯勤居處浮漚無以自存冬日栗栗
上下同雲無衣無褐何以自溫六月徂暑炎赫
來臻無絺無綌何以蔽身無食不飽永離歡欣

附錄

蔡邕傳

宋范曄

蔡邕字伯喈陳留圉人也六世祖勲好黃老平
帝時爲郿令王莽初授以厭戎連率勲對印綬
仰天歎曰吾策名漢室死歸其正昔曾子不受
季孫之賜况可事二姓哉遂攜將家屬逃入深
山與鮑宣卓茂等同不仕新室父稜亦有清白
行謚曰貞定公邕性篤孝母常滯病三年邕自
非寒暑節變未嘗解襟帶不寢寐者十旬母卒

廬于塚側動靜以禮有兔馴擾其室傍又木生
連理遠近奇之多往觀焉與叔父從弟同居三
世不分財鄉黨高其義少博學師事太傅胡廣
好辭章數術天文妙操音律桓帝時中常侍徐
璜左悺等五侯擅恣聞邕善鼓琴遂白天子勅
陳留太守督促發遣邕不得已行到偃師稱疾
而歸閑居翫古不交當世感東方朔客難及楊
雄班固崔駰之徒設疑以自通乃斟酌群言辯
其是而矯其非作釋誨以戒厲云爾建寧二年

辟司徒橋玄府玄甚敬待之出補河平長召拜
郎中校書東觀遷議郎邕以經籍去聖久遠文
字多謬俗儒穿鑿疑誤後學熹平四年乃與五
官中郎將堂谿典光祿大夫楊賜諫議大夫馬
日磾議郎張馴韓詵太史令單颺等奏求正定
六經文字靈帝許之邕乃自書冊於碑使工鐫
刻立於太學門外於是後儒晚學咸取正焉及
碑始立其觀視及摹寫者車乘日千餘兩填塞
街陌初朝議以州郡相黨人情比周乃制婚姻

之家及兩州人士不得對相監臨至是復有三
互法禁忌轉密選用艱難幽冀二州久缺不補
邕上疏書奏不省初帝好學自造皇義篇五十
章因引諸生能爲文賦者本頗以經學相招後
諸爲尺牘及工書鳥篆者皆加引召遂至數十
人侍中祭酒樂松賈護多引無行趣勢之徒並
待制鴻都門下熹陳方俗閭里小事帝甚悅之
待以不次之位又市賈小民爲宣陵孝子者復
數十人悉除爲郎中太子舍人時頗有雷霆疾

風傷樹拔地震隕雹蝗蟲之害又鮮卑犯境
侵賦及民六年七月制書引咎詔羣臣各陳政
要所當施行邕上封事書奏帝乃親迎氣北郊
及行辟雍之禮又詔宣陵孝子爲舍人者悉改
爲丞尉焉光和元年遂置鴻都門學畫孔子及
七十二弟子像其諸生皆勅州郡三公舉用辟
召或出爲刺史太守入爲尚書侍中乃有封侯
賜爵者士君子皆耻與爲列焉時妖異數見人
相驚擾其年七月詔召邕與光祿大夫楊賜諫

諫大夫馬日磾議郎張華太史令單颺詣金商
門引入崇德殿使中常侍曹節王甫就問災異
及消改變故所宜施行邕悉心以對事在五行
天文志又特詔問曰比災變互生未知厥咎朝
廷焦心載懷恐懼每訪群公卿士庶聞忠言而
各存括囊莫肯盡心以邕經學深奧故密特稽
問宜披露失得指陳政要勿有依違自生疑諱
具對經術以阜囊封上邕對章奏帝覽而歎息
因起更衣曹節於後竊視之悉宣語左右事遂

漏露其爲邕所裁黜者皆側目思報初邕與司徒劉邵素不相平叔父衛尉質又與將作大匠楊球有隙球卽中常侍程璜女夫也璜遂使人飛草言邕質數以私事請託於邵邵不聽邕含隱切志欲相中於是詔下尚書召邕詰狀邕上書自陳於是下邕質於洛陽獄劾以仇怨奉公議害大臣大不敬棄市事奏中常侍呂強愍邕無罪請之帝亦更思其章有詔減死一等與家屬髡鉗徙朔方不得以赦令除楊球使客追路

刺邕客感其義皆莫爲用球又賂其部主使加
毒害所賂者反以其情戒邕故每得免焉居五
原安陽縣邕前在東觀與盧植韓詵等撰補後
漢記會遘事流離不及得成因上書自陳奏其
所著十意分別首目連置章左帝嘉其才高會
明年大赦乃宥邕還本郡邕自徙及歸凡九月
焉將就還路五原太守王智餞之酒酣智起舞
屬邕邕不爲報智者中常侍王甫弟也素貴驕
慙於賓客詎邕曰徒敢輕我邕拂衣而去智銜

之密告邕怨於囚放謗訕朝廷內寵惡之邕慮
卒不免乃亡命江海遠跡吳會往來依太山羊
氏積十二年在吳吳人有燒桐以爨者邕聞火
烈之聲知其良木因請而裁爲琴果有美音而
其尾猶焦故時人名曰焦尾琴焉初邕在陳留
也其鄰人有以酒食召邕者比往而主以酺焉
客有彈琴於屏邕至門試潛聽之曰愜以樂召
我而有殺心何也遂反將命者告主人曰蔡君
向來至門而去邕素爲邦鄉所宗主人遽自追

而問其故邕具以告莫不撫然彈琴者曰我向
鼓絃見螳螂方向鳴蟬蟬將去而未飛螳螂爲
之一前一卻吾心聳然惟恐螳螂之失之也此
豈爲殺心而形於聲者乎邕莞然而笑曰此足
以當之矣中平六年靈帝崩董卓爲司空聞邕
名高辟之稱疾不就卓大怒詈曰我力能族人
蔡邕遂偃蹇者不旋踵矣又切勅州郡舉邕詣
府邕不得已到署祭酒甚見敬重舉高第補侍
御史又轉侍書御史遷尚書三日之間周歷三

臺遷巴郡太守復留爲侍中初平元年拜左中
郎將從獻帝遷都長安封高陽鄉侯董卓賓客
部曲議欲尊卓比太公稱尚父卓謀之於邕邕
曰太公輔周受命翦商故特爲其號今明公威
德誠爲巍巍然比之尚父愚意以爲未可宜須
關東平定車駕還反舊京然後議之卓從其言
初平二年六月地震卓以問邕邕對曰地動者
陰盛侵陽臣下踰制之所致也前春郊天公奉
引車駕乘金華青盖爪畫兩轡遠近以爲非宜

卓於是改乘皂蓋車卓重邕才學厚相遇待每
集讌輒令邕鼓琴贊事邕亦每存匡益然卓多
自恨用邕恨其言少從謂從弟谷曰董公性剛
而遂非終難濟也吾欲東奔兗州若道遠難達
且遯逃山東以待之何如谷曰君狀異恒人每
行觀者盈集以此自匿不亦難乎邕乃止及卓
被誅邕在司徒王允坐殊不意言之而歎有動
於色允勃然叱之曰董卓國之大賊幾傾漢室
君爲王臣所宜同忿而懷其私遇以忘大節今

天誅有罪而反相傷痛豈不共爲逆哉臣輒付
廷尉治罪邕陳辭謝乞黥首刖足繼成漢史士
大夫多矜救之不能得太尉馬日磾馳往謂允
曰伯喈曠世逸才多識漢事當續成後史爲一
代大典且忠孝素著而所坐無名誅之無乃失
人望乎允曰昔武帝不殺司馬遷使作謗書流
於後世方今國祚中衰神器不固不可令佞臣
執筆在幼主左右旣無益聖德復使吾黨蒙其
訕議日磾退而告人曰王公其不長世乎善人

國之紀也制作國之典也滅紀廢典其能久乎
邕遂死獄中允悔欲止而不及時年六十一摺
紳諸儒莫不流涕北海鄭玄聞而歎曰漢世之
事誰與正之衮州陳留聞皆畫像而頌焉其撰
集漢事未見錄以繼後史適作靈紀及十意又
補諸列傳四十二篇因李權之亂湮沒多不存
所著詩賦碑誄銘讚連珠箴箴論議獨斷勸學
釋誨叙樂大訓篆勢祀文章表書記凡百四篇
傳於世

論曰意氣之感士所不能忘也流極之運有生
所共深悲也當伯喈抱鉗扭徙幽裔仰日月而
不見照燭臨風塵而不得經過其意豈及語平
日倖全人哉及解刑衣竄甌越潛舟江壑不知
其遠捷步深林尚苦不密但願北首舊丘歸骸
先塋又可得乎董卓一旦入朝辟書先下分明
枉結信宿三遷匡導旣申狂僭屢革資同人之
先號得比叟之後福屬其慶者夫豈無懷君子
斷刑尚或爲之不舉况國憲倉卒慮不先圖矜

情變容而罰同邪黨執政乃追怨子長謗書流
後放此爲戮未或聞之典刑

贊曰邕實慕靜心精辭綺斥言金商南徂北徙
籍梁懷董名澆身毀

弔蔡邕文

晉陸機

彼洪川之方割豈一簣之所堙故尼父之惠訓
智必愚而後賢諒知道之已妙曷信道之未堅
忽寧子之保已效萇叔之違天冀滢河之遠日
忘朝露之短年

遺事

建寧五年正月車駕上原陵蔡邕爲司徒掾從公行到陵見其儀愾然謂同坐者曰聞古不墓祭朝廷有上陵之禮始爲可損今見威儀察其本意乃知孝明皇帝至孝惻隱不可易舊或曰本意云何昔京師在長安時其禮不可盡得聞也光武卽世始葬于此明帝嗣位踰年羣臣朝正感先帝不復聞見此禮乃帥公卿百寮就園陵而創焉尚書陞西陞爲神坐天子事亡如事

存之意苟先帝有瓜葛之屬男女畢會王侯大
夫郡國計吏各向神坐而言庶幾先帝神覓聞
之今者日月久遠後生非時人但見其禮不知
其哀以明帝聖孝之心親服三年久在園陵初
興此儀仰察几筵下顧羣臣悲切之心必不可
堪邕見太傅胡廣曰國家禮有煩而不可省者
不知先帝用心周密之至於此也廣曰然子宜
載之以示學者邕退而記焉

邕告吳人曰吾昔嘗經會稽高遷亭覘屋椽竹

東間第十六可以爲笛取用果有異聲伏蒲長
笛賦序云柯亭之觀以竹爲椽邕取爲笛奇聲
獨絕也

張騫文士傳

蔡中郎好琴入清溪訪鬼谷先生故居山五曲
曲有靈迹中郎每一曲制一弄三年曲成出呈
馬季長王子師輩皆嘆異之

世說新語

陳留蔡邕避難過吳讀碑文因刻石旁作文字
曰黃絹幼婦外孫壻曰

吳苑

王允數與邕會議允詞常屈由是銜邕及誅董卓

車并收邕馬日碑曰伯喈忠孝且曠世逸才多識漢事當定十志子殺之海內失望矣允曰無蔡邕獨當無十志何損遂殺之

殷芸小說

東國宗敬蔡邕不言名底稱蔡君充州陳留並

圖畫形像而頌之曰文同三閭孝齊參騫

蔡邕別傳

韋誕奏蔡邕自矜能兼斯籀之法非純素不妄

下筆用張芝筆左伯紙及臣墨皆古法兼此三

具又得巨手然後可以盡徑丈之勢方寸千言

三輔
決錄

孔北海與蔡中郎素厚蔡亡後有虎賁貌類於
蔡北海每酒後引與共坐曰雖無老成人且有

典刑

世說新語

張衡死月蔡邕母始懷孕此二人才貌甚相類
時人云邕是衡之後身

殷芸小說

蔡伯喈封高陽侯作一鼎記漢家曆數邕自書

藏于泰山

鼎錄

蔡邕飲酒乃至一石嘗醉在地上臥人名曰醉

龍

語林

蔡中郎集

附錄

錄

七

集評

張衡通瞻蔡邕精雅文史彬彬隔世相望是則

松栢異心而同貞金玉殊質而皆寶也

文心
雕龍

蔡邕釋誨體與文炳

文心
雕龍

蔡邕銘思獨冠古今橋公之銘吐納典謨朱穆

之鼎全成碑文溺所長也

文心
雕龍

自後漢以來碑碣雲起才鋒所斷莫高蔡邕觀

楊賜之碑骨鯁與陳郭二文句無擇言周乎

參碑莫非清允其敘事也該而要其綴采也雅

而澤清詞轉而不窮乃義出而卓立察其爲才

自然而至

文止
雅道

伯喈翠鳥音盡行間

李白

青青河畔草相傳蔡中郎作此詩之妙獨絕千

言其意續曲折有餘而興寄無盡

詩
蔡

翠鳥詩是寄託不是題詠所以能遠又能微

糾繆

劉鎮南碑

君諱表字景升山陽高平人也君應期挺生瑰
偉大度黃中通理博物多識爲郡功曹千里稱
平上計吏辟大將軍府遷北軍中候在位十有
以賢能特選拜刺史荊州永平元年十一月到
官清風先驅莫不震肅奸宄改節不仁引頸君
乃頌愷悌流惠和慕唐叔之野棠思王遵之驅
印賦政造次德化宣行俄而漢室太亂禍起蕭

牆賊臣專政豪雄虎爭縣邑間里奸宄煙發州
縣殘破天下土無四海大壞當是時也雖存孔
翟之聖賢育貢之勇勢無所措其智力君遇險
而建畧遭難而發權招令英俊爰得驍雄謀臣
武將合策明計出次北境遷屯漢陰因滄浪以
爲隍卽春葉以爲牆南撫衡陽東綏淄沂西靖
巫山保乂四疆達才任良式序賢能簡將命卒
基布星陳備要塞之處戍八方之邊勸農務農
以固以漁採粟紅腐年穀豐夥江湖之中無

之寇沅湘之間無攘竊之民郡守令長冠帶
率服府寺亭鄉崇棟高門皆如其舊當世知名
輟輟而至四方強負自遠若歸窮山幽谷於是
爲邦百工集趣機巧萬端器械變通利民無窮
隣邦懷慕交揚益州蓋造驛使冠蓋相望下民
有康哉之歌辭后有歸功之緒莫匪嘉績克厭
帝心卽遷州牧又遷安南將軍領州如故于時
諸州或失土流播或水潦沒害人民死喪百遺
二三而君保完萬里至于滄海聖朝欽亮析圭

授土遣御史中丞鐘繇卽拜鎮南將軍錫鼓吹
大車策命褒崇謂之伯父置長史司馬從事中
郎開府辟召儀如三公上繇遣左中郎將祝耽
授節以增威重并督交揚二州委以東南惟君
所裁雖周召授分陝之任不遠過也交州殊遠
王塗未夷夷民歸附大小受命其郡縣長吏有
缺皆來請之君權爲選置以安荒裔輒別上聞
齊桓遷邢封衛之義也武功旣亢廣開靡泮設
俎豆陳鼎彝親行鄉射躋彼公堂篤志好學吏

民子弟受學之徒蓋以千計洪生巨儒朝夕講
誨閭閻如也雖洙泗之間學者所集方之無異
也深愍末學遠本離實乃令諸儒改定五經章
句刪刻浮辭芟除煩重又求遺書寫還新者留
其故本於是古典畢集充于州閭及延見武將
文吏教令溫雅禮接優隆言不及軍旅之事辭
不逮官曹之文上論三墳八索之典下陳世教
忠義之方內剛如秋霜外柔如春陽不伐其善
不有其庸如彼川流每往滋通可謂適理不才

命世希有者已仁者壽宜享期耆昊天不弔年六十有七建安十三年八月遘疾殞薨耕夫罷耜織女投杼老幼哀號若喪父母時道路艱險留墳州土轉移歸葬父勉其子妻勉其夫欲共扶送至于鄉里南陽太守樂鄉亭侯旻恩等言及志在州里者各發卒具送靈柩之資子授徵拜五官中郎將乃疏上請歸本縣葬見聽許太和二年葬於先塋於是臣故忻洽咸以爲申伯韓侯之翼周室受輅車乘馬玄裘赤舄之賜詩

人諫功列于大雅至今不朽況乎將軍牧二州
歷二紀功載王府賜命優備賴而生者毓子孕
孫能不歌嘆乃作頌曰

猗歟將軍膺期挺生桓桓其武溫溫其仁初幹
千里允顯使臣幕府禮命集于北軍督齊禁旅
如羆如熊眷然南顧綏我荆衡將軍之來民安
物豐江湖交壤刑清國典蔽芾甘棠召伯聽訟
周人勿剗我賴其楨欲報之德胡不億年如何
殂逝孤棄萬民鐫勒墓石以紀洪勲昭示來世

垂芳後昆

中郎舊集載劉征南碑按中郎被誅在初平
三年劉景升以建安十三年方沒去邕沒已
十七年矣此碑疑是王仲宣所作後人錯記
姓名姑載于後以俟君子